



COMUNU DE CABUDERRA

Tzitadi Metropolitana de Casteddu

DELIBERATZIONI DE SA GIUNTA COMUNALI N. 41 DE SU 08/03/2023

OGETU: SERVÌTZIU DE TRASPORTU A FAVORI DE PERSONIS CUN DISABILIDADI MANNA E DE ANTZIANUS. CUNFIRMA TARIFAS PO SA CUMPARTECIPATZIONI A SU GASTU DE SU SERVÌTZIU DE PARTI DE IS BENEFITZIÀRIUS PO S' ANNUALIDADI 2023.

S' annu 2023, su 08 de su mesi de Martzu a ora de is 12.45, in sa residèntzia comunali, cunvocada a manera amesturada presèntzia/videocunferèntzia cunforma a su Regulamentu Comunali po sa modalidadi telemàtica, s' est atobiada sa Giunta Comunali cun is personis chi s'ghint:

<i>Nòmini e Sangunau</i>	<i>Càrriga</i>	<i>Presenti</i>
Beniamino Garau	Sìndigu	Eja
Dessi Donatella	Assessori	Eja
Frongia Pietro	Assessori	Eja
Montis Giovanni	Assessori	No
Sorgia Silvia	Assessori	Eja
Solinas Marco	Assessori	Eja
Garone Katuscia	Assessori	Eja

Presentis: 6

Ausentis: 1

Pigat parti a sa setziada su Segretàriu Generali Sa Dotora Felicina Deplano.

Su Sìndigu, Beniamino Garau, ndi liat sa presidèntzia e de chi at averiguau su nùmeru de is presentis, decrarat aberta s' adunàntzia.

SA GIUNTA COMUNALI

Postu chi:

- su Comunu de Cabuderra, punnendi a amellorai is políticas sotzialis e finas sa calidadi de vida de is personis residentis, at istituui e disciplinai su servìtziu de trasportu sotziali. Su servìtziu bolit satisfai is esigèntzias de mobilitadi de is fàscias de populatzioni prus dèbilis, po su prus bolit agiudai a is personis cun disabilitadi manna e antzianus, chi si podint movi e trantziri sena de personali mèdicu e/o infermierìsticu, po ddus agiudai a movi a struturas sanitàrias o a àterus logus;

- sa gestioni de custu servìtziu, chi est a favori de famìllias chi no si podint movi a sa sola, dda tenit sa sotziedadi Voyages de Lucina Piscedda- de Cabuderra, chi at bintu s'apaltu;

Cunsiderau chi:

- sa L.R.23 de su 23.12.2005 "Sistema integrau de is servìtzios a sa personi" previdit chi in s' art.27 sa cumpartecipazioni de is destinatàrius a su gastu de is servìtzios siat cunforma a sa situatzioni econòmica ISEE;

- s'art.43 lìtera e) de sa lei regionali 23/05, previdit chi sa Regioni Sardìnnia si cunformit a unu Regulamentu cun sa disciplina de totu is elementus e is protzedimentus po sa valutatzioni de sa capatzidadi econòmica de is destinatàrius de is interventus e sa determinatzioni de sa cumpartecipazioni a su gastu;

- s'art. 46 de su DPGR n. 4 de su 22 de su mesi de argiolas 2008 narat: "Po sa determinatzioni de sa cumpartecipazioni a su gastu de is prestatzionis sotzialis sa Giunta regionali sceberat po cada annu is fàscias ISEE po sa cumpartecipazioni a su gastu de is servìtzios e is tipologias de servìtziu chi previdint sa cumpartecipazioni";

- a dii de oi sa Regioni Sardìnnia no at ancora aprovau su Regulamentu de su sistema tarifàriu po sa determinatzioni de sa cumpartecipazioni a su gastu de is prestatzionis sotzialis;

Liada a cunsideru sa deliberatzioni C.C. n. 10 de su 14.03.2017, chi pertocat s' aprovatzioni de su "Regulamentu po su servìtziu de trasportu a favori de antzianus e de personis cun disabilitadi manna - Adeguamentu a sa normativa ISEE";

Pigau atu chi:

- su gastu de custu servìtziu de su 01.07.2020 a su 30.06.2023 est de € 255.488,52 (sena de iva a su 10%), cun unu gastu po cada km de € 1,867 (bogada s' IVA), est a nai € 2,0537;

- is tarifas a càrrigu de is imputadoris po s' annu 2022 no funt mudadas (delibera de cunfirma G.C. n. 30 de su 10.03.2022);

Torrada sceda de cunfirmari finas po s' annu 2023 is tarifas a càrrigu de is beneficiàrius de su Servìtziu de trasportu sotziali cunforma a sa tabella in acàpiu a custu atu etotu;

Arriciu parri a favori cunforma a s'art. 49 de su D.L. gs 267/2000, po su chi spetat sa regularidadi tècnica e contàbili de parti de sa Responsàbili de su Setori políticas Sotzialis e de sa Responsàbili de su Servìtziu finantziàriu;

Cun votatzioni a favori e a totòmini cunforma a sa lei;

DELÌBERAT

De cunfirmari finas po s' annu 2023 is tarifas a càrrigu de is beneficiàrius de su Servìtziu de trasportu sotzial;

De decrarai chi custu provedimentu at a balli luegus etotu, cunforma a s' artìculu 134, corriedda 4, de su d.Lgs. n. 267/2000.
